

Cadangan kepada Jawatankuasa Pilihan Khas Parlimen Berhubung dengan Proses Pilihanraya

Disediakan oleh:



**Suara Rakyat Malaysia (SUARAM)
Cawangan Pulau Pinang**

15hb Disember 2011

Pulau Pinang

Sistem pilihanraya yang adil dan bebas adalah sesuatu yang amat penting kerana hanya dengan pilihanraya yang adil dan bebas, wujudnya pemantauan yang efektif daripada rakyat terhadap kerajaan.

Suara Rakyat Malaysia (SUARAM) menyokong dengan sepenuhnya 8 tuntutan BERSIH 2.0, antaranya:

1. Bersihkan senarai undi

- Senarai undi harus dibersihkan dengan segera untuk menyingkirkan 'pengundi hantu' seperti orang yang telah meninggal.
- Pendaftaran pengundi automatik yang diselarikan dengan senarai Jabatan Pendaftaran Negara boleh menyelesaikan masalah pengundi hantu dalam jangka masa panjang.

2. Mereformasikan undi pos

- SEMUA pengundi seharusnya dibenarkan untuk mengundi melalui undi pos atau mengundi lebih awal sekiranya seseorang individu itu tidak dapat berada di kawasan pengundian semasa hari mengundi.
- Anggota polis dan tentera yang tidak bertugas harus mengundi seperti biasa pada hari mengundi.
- Undi pos mesti dijalankan dengan telus! Agen parti politik harus dibenarkan untuk memantau proses undi pos.

3. Gunakan dakwat kekal

- Penggunaan dakwat kekal boleh mengelakkan seseorang (atau pengundi hantu) daripada mengundi beberapa kali.

4. Masa kempen minima 21 hari

- Masa yang lebih panjang diperlukan untuk calon menyebarkan maklumat, terutamanya di kawasan luar bandar dan pedalaman. Contohnya, pilihanraya negeri Sarawak baru-baru ini diberi masa kempen 10 hari sahaja.
- Pada 1955, ketika era pemerintahan penjajah, pilihanraya mempunyai masa kempen sepanjang 42 hari. Manakala semasa Pilihanraya Umum ke-12 pada 2008, masa kempen 8 hari sahaja.

5. Akses media yang bebas dan adil

- RTM dan Bernama adalah agensi media yang dibiayai oleh kerajaan. Mereka sepatutnya memberi liputan yang seimbang dan adil untuk semua parti yang bertanding.
- Parti politik harus dibenarkan untuk membuat pengiklanan tanpa sebarang diskriminasi dan penapisan.
- Ini adalah mengenai keadilan! Semua media perlu memberikan hak untuk semua parti membalas kepada tuduhan-tuduhan negatif terhadap mereka.

6. Kukuhkan institusi awam

- Institusi awam dan kakitangan kerajaan harus tidak berat sebelah dan menegakkan undang-undang dan demokrasi. Institusi awam harus direformasikan supaya bertindak secara bebas, menegakkan undang-undang dan melindungi hak asasi manusia.

Contohnya :

Suruhanjaya Pilihanraya (SPR) hendaklah memastikan pilihanraya yang bebas dan adil. Badan Kehakiman harus memelihara kebebasannya dan menegakkan kedaulatan undang-undang tanpa gentar atau memihak.

Peguam Negara perlu bertindak secara tidak berat sebelah dan mengutamakan kepentingan rakyat.

Suruhanjaya Pencegahan Rasuah Malaysia harus bertindak dengan adil dan menghentikan pendakwaani selektif dan penyalahgunaan kuasa.

Polis Di Raja Malaysia perlu bertindak secara profesional dalam melaksanakan tugas dan menegakkan kedaulatan undang-undang.

7. Hentikan rasuah

- Rasuah adalah kegiatan mencuri dari rakyat untuk kepentingan peribadi. Rasuah menyebabkan orang kaya bertambah kaya dan golongan miskin semakin miskin.

Pembelian undi harus dihentikan!

- Akta Kesalahan Pilihanraya 1954 mesti dikuatkuasakan.

8. Hentikan politik kotor

- BERSIH 2.0 menuntut SEMUA parti politik untuk menghentikan politik kotor.

Selain itu, SUARAM juga ingin mengemukakan beberapa cadangan yang lain demi menyempurnakan sistem pilihanraya ini, iaitu:

9. Persempadanan kawasan pilihanraya yang serata

- Persempadanan kawasan pilihanraya yang tidak serata menyebabkan nilai setiap undi tidak sama. Mengikut statistic terbaru yang diperoleh, kawasan Parlimen yang terbesar terdiri daripada 104,185 orang pengundi, manakala kawasan Parlimen yang terkecil hanya terdiri daripada 5,079 orang pengundi, dan ini telah menyebabkan jurang yang besar antara kawasan-kawasan Parlimen ini.

- Sebenarnya persempadanan kawasan pilihanraya yang serata adalah sesuatu yang mungkin seperti Amerika dan Australia, yang masing-masing merupakan negara yang mempunyai jumlah penduduk yang banyak tetapi masih dapat membahagikan sempadan kawasan pilihanraya dengan serata.

- Persempadanan kawasan pilihanraya perlu mencerminkan prinsip "seorang satu undi".

10. Membenarkan pendaftaran secara automatik bagi mereka yang berumur 18 tahun

Mereka yang berumur 18 tahun dan ke atas sudah cukup matang untuk memilih wakil mereka dalam kerajaan dan harus diberikan perwakilan.

11. Membenarkan perhimpunan secara aman selain daripada ceramah

Perhimpunan secara aman merupakan salah satu cara untuk menyampaikan suara rakyat, yang terutamanya penting semasa pilihanraya. Hal ini demikian kerana merupakan salah satu saluran yang mana rakyat boleh memastikan bakal wakil rakyat mendengar suara mereka dan membawa suara mereka ke dalam Parlimen.

Pihak polis tidak harus mengganggu tetapi membantu mengawal keselamatan semasa perhimpunan aman diadakan.